

# Athör cī Paulo gät kɔc Epethuth Wēt nom

Wēt tuen kam keriëec ebën yen gät Paulo athör kënë tënë kɔc Epethuth ë wēt kënë, “Kë cī Nhialic guiir, ke bī jal thöl akölden cī tak. Ee lɔn bī yen kāk cī cak ebën nhial ku piny mat yiic, ku tēu Raan cī lɔc ku dɔc kenhīm tuen.” (1:10) Kɔc cī gam aya awic ke bik deet yic, ku bik ya pīr kēdiit cī Nhialic guiir kënë yic. Ku bī kɔc aa tōk ebën kek Jethu Krītho.

Abaŋ athöör yic tuen, aci Paulo nyuɔth tē bī kɔc keyiic mat thīn, ke lēk kɔc dhël cī Nhialic kacke kuany thīn. Ku ye kēdē cī ke adumuɔm päl piny thīn, ku yīk kɔc lääu nom ë Wēnde Jethu Krītho. Ku aye Wēi Nhialic nyuɔth ɣo lɔn bī athön Nhialic yenhom tiεŋ. Paulo ë kɔc ba athöör kueen lēk aban ë rou yic, lɔn nadē ke kɔc bī ya tōk kek Raan cī lɔc ku dɔc adhil ayic ë piērden yic kedhie. Acī jam ë waal juēc tē bī kɔc ë Nhialic luai tōk aa nyuɔth thīn, ke cī röt mat kek Raan cī lɔc ku dɔc. Akut kɔc cī gam acit guɔp, ku ye Raan cī lɔc ku dɔc yen nom, tēdē ke cit luak ku ye Raan cī lɔc ku dɔc mēen, tēdē ke ye tik, ku ye Raan cī lɔc ku dɔc muɔnyde. Athör kënë ë jam wël thiek yiic apei, rin raan ë gät ye agēt ë guiēr cī dhēēŋ Nhialic rēer kek Raan cī lɔc ku dɔc bēi yenhom ku yepuɔ. Ku kuat keriëec ebën aye tīŋ nhiēr Raan cī lɔc ku dɔc yic, nāk, ku päl piny adumuɔm, ku dhēēŋ la cök.

*Käk tō thīn*

Muöth tueŋ 1:1-2

Raan cī lōc ku dōc ku luanj ë Nhialic 1:3–3:21

Pīr ë yam rēer ke Jethu 4:1–6:20

Muöth ciēen 6:21-24

<sup>1</sup> Ee γen Paulo cī Nhialic kuany ba ya atuny Jethu Krītho. Tēnē kōc Nhialic rēer Epethuth, kōc cī Jethu Krītho gam piērden yic.

<sup>2</sup> Bī Nhialic Wāda kek Bānyda Jethu Krītho we gām dōör ku athiēei.

*Raan cī lōc ku dōc ë dōc wēi bēēi*

<sup>3</sup> Lecku Nhialic Wun Bānyda Jethu Krītho! Rin cī γok rōt mat kek Jethu Krītho, acī yen γo yiēk dōc wēi ë riēl nhial. <sup>4</sup> Thēer ke piny kēc cak, Nhialic acī γo kuēny bei buk aa miēthke, wēt cī γok mat kek Jethu, acī γo cōl aye kacke, kōc cīn gup awuōc.

<sup>5</sup> Rin nhiēer yen γo, acī Nhialic looi thēer lōn bī Jethu Krītho γo cōl aye miēthke, ku kēnē yen ë miēt puōu Nhialic yen wīc. <sup>6</sup> Lecku Nhialic rin kāpuōth juēc apēi cī gām γo ë path, rin cī yen Wēnden nhiēer juaar riēnkua. <sup>7</sup> Rin thon Raan cī lōc ku dōc acī γok jāl riēl jōŋrac yic, rin cī adumuōōmkua pāl piny. Ku kēya, aye Nhialic nyuōth γo lōn dūit dhēēŋde apēi.

<sup>8</sup> Dhēēŋ cī gām γo ke dīt apēi, rin ŋiēēc ku dēt yic kāŋ. <sup>9</sup> Acī Nhialic nyuōth γo yen kēden cī guiir bī looi, ku acuk yōk tēnē Raan cī lōc ku dōc, cōk a lōn wāär cī yen ye thiaan. <sup>10</sup> Kē cī Nhialic guiir ke bī jāl thōl akōlden cī tak, ee lōn bī yen kāk cī cak ēbēn nhial ku piny mat yiic, ku tēēu Raan cī lōc ku dōc kenhīim tueŋ.

<sup>11</sup> Ee riēnke yen aye γo cōl aye mīth Nhialic. Kēriēēc ēbēn aacī Nhialic guiir kēya wāthēer, ku ë

yen ke biöök təcit tē wic ye. <sup>12</sup> Kēya lecku Nhialic yok kəc tuen wäär cī la nōth tēnē Raan cī ləc ku dəc.

<sup>13</sup> Ku emən aya, wek aacī yic piŋ, yiny yen wēt puəth yam ye Nhialic we luək. Ku wäär cī wek Raan cī ləc ku dəc gam, acī yen we yiək Wēi Nhialic wäär cī thən ka bī yiək kacke. Wēi yen ē ye nyuəəth lən ye wek kacke. <sup>14</sup> Ku Wēi Nhialic yen ē ye nyuəəth lən bī yok kāwäär cī Nhialic thən ka bī yiək ɣo yök. Ku aye kēnē nyooth lən cī Nhialic ɣo wēer bei riel jəŋrac yic buk aa kacke. Kēya, buk Nhialic aa leec akölaköl.

### *Röök ē Paulo*

<sup>15</sup> Ku wēt kēnē, tēɣən piŋ ɣen gām cī wek wēt Bēny Jethu gam, ku nhiēr nhiēr wek kacke, <sup>16</sup> yen akēc ɣen nhom kaŋ mää ba we atak, tē röök ɣen Nhialic aya leec riɛnkun. <sup>17</sup> ɣen ē rēer ɣa thiēc Nhialic Wādan la diik, ku yen Wun Jethu Kritho, bī we gām Wēike bī we col aŋic kəŋ, ku nyuth we Nhialic bək ŋic apath. <sup>18</sup> ɣen ē röök aya bək yic ŋic. Kēya bək ŋic lən ē yen yic lən bī wek kajuēc puəth cī tōəu tēnē we yök, rin cī yen we cəl. Ku abək ŋic aya lən kajuēc puəth cī thən bī ke gām kacke aa thiek yiic apēi. <sup>19</sup> Ku kēya, abək ŋic aya lən rielde adit kəŋ ebən. Ku yeen alui ɣogup rin cī yok wētde gam. Riel lui ɣogup kēnē athəŋ ke rieldit, <sup>20</sup> wäär jət yen Raan cī ləc ku dəc bei raŋ yic, kam kəc cī thou ku jət nhial, ku nyuuc kəŋ cuēc Nhialic. <sup>21</sup> Raan cī ləc ku dəc amac wēi ril tō nhial ebən, cək alən le kek rieldit. Rienske aa thiek yiic tēnē rin bānydit mēc. Ku aacie bāny mēc emən ē röt, aabī yiic thiek tēnē rin bāny bī mac aköldä. <sup>22</sup> Ku Nhialic acī kəriēēc

ëbën tääu yecök, ku looi bï a yen wat akut kəc cï gam pinyhom. <sup>23</sup> Ku akut kəc cï gam yen ë guöp Raan cï ləc ku dəc, yen thiän wëi Raan cï ləc ku dəc. Ku ë yen pïr gäm këriëc ëbën tëriëc ëbën.

## 2

### *Thon cï ya pïr*

<sup>1</sup> Thëer, Nhialic acï we tëm thou rin awuöcdit rëër wegup. <sup>2</sup> Wäthëer wek aa we ye jəŋrac, jəŋ yen mac jakrəc ëbën buəth cök, jəŋ yen ye kəc cïi Nhialic thek wëtde gam ëmën. <sup>3</sup> Yok aa yo thöŋ ke ke, ke yo pïr pïr rac. Ayeku looi kuat käk wïc guäpkua ku piäthkua. Ku pïrdan rac aye Nhialic yo tëm awuöc cïmën kəc kök ë luui käreç.

<sup>4</sup> Nhialic ayer puşu, ku nhiër nhiëer yen yo adit apëi. <sup>5</sup> Nawën cək atiëëpkua thou rin adumuööm juëc rëër yogup, yok aaci Nhialic cəl aben pïr kek Raan cï ləc ku dəc. Ku ee dhëëŋ Nhialic yen acï yo luök. <sup>6</sup> Ku rin cï yok aa tök kek Raan cï ləc ku dəc Jethu, Nhialic acï yo jət ë thou yic ku buk rëër bäänyde yic nhial kek Jethu Kritho. <sup>7</sup> Ee looi Nhialic këya rin bï kəc aköldä piathden cïn kë thöŋ kek tïŋ, rin nhiëer yen yo, rin Raan cï ləc ku dəc Jethu. <sup>8</sup> Rin ë piath Nhialic yen acï we kony bäk pïr rin cï wek wët Jethu gam. Ee miöç Nhialic yen acəl we agam Jethu. <sup>9</sup> Pïr cuk yok acie rin ë luöida ë röt nadë ke yo nhiam ye. <sup>10</sup> Ee Nhialic guöp yen acï ye looi këya. Ku rin ye yok tök kek Raan cï ləc ku dəc Jethu, acï yo cak buk këpath aa looi, ku ë yen kë cï guiir buk aa looi.

### *Yok aa tök kek Raan cï ləc ku dəc*

<sup>11</sup> Këya, wek aa we cie kəc Itharel. Ku këya, wek aa we ye kəc Itharel cəł wäthæer kəc këc ηoot. Ku kəc Itharel aake ye röt cəl aaye kəc cī ηoot. Ku ηuötden ye ke ηoot, ee yekë ye looi kegup ë path. <sup>12</sup> Ku wäär wek aa we cie kəc Raan cī ləc ku dəc. Wek aa we ye thäi, wek aa we cie kəc Itharel, kəc cī Nhialic ləc. Wek aa we liu löη döör Nhialic yic, löη kəc ke tit bën Jethu Bányda. Wek aa we rëer we kuc Nhialic. <sup>13</sup> Ëmën, rin cī wek aa tök kek Jethu Kritho, wek wäär cək mæc wek aaci bëëi tětthiök rin thon Raan cī ləc ku dəc.

<sup>14</sup> Rin Raan cī ləc ku dəc aci döör looi kam kəc Itharel ku kəc cie kəc Itharel rin cī γok aa kac tök. Riemde aci këwäär ke tek yiic, ku cəl ke aaye kəc man röt nyaai. <sup>15</sup> Aci löη kəc Itharel teem këu ë thuənde, rin bi yen kəc Itharel ku kəc cie kəc Itharel cəl aaye kac tök rin cī kek röt mat kek ye, ku këlä, aci döör bëëi. <sup>16</sup> Ku thon cī Raan cī ləc ku dəc thou tim cī rīiu këu, acä kuεeth rëer kamkun nyaai. Ku thuənde aci yen ke cəl aaye kəc Nhialic kedhie. <sup>17</sup> Këya, Raan cī ləc ku dəc aci bën ku lək kəc Wët Puəth Yam ë döör bëëi tənë kəc ëbën, wek kəc cie kəc Itharel wäär mec ke Nhialic ku kəc Itharel wäär thiök ke ye. <sup>18</sup> Ku ë rin Raan cī ləc ku dəc yen ë γo ëbën, kəc Itharel ku kəc cie kəc Itharel cəl aala tē rëer Nhialic thīn ë Wëi Nhialic tööη.

<sup>19</sup> Këya, wek kəc cie kəc Itharel, wek aaci ben aa læi ëmën, wek aa tök kek kəc cī Nhialic ləc. Wek aa many töη ë Nhialic. <sup>20</sup> Ku week aya, wek aaci γön cī atuuc ku kəc kək Nhialic tīη jək cök, ku Jethu Kritho yen ë mën. <sup>21</sup> Raan cī ləc ku dəc yen ë kë cī buth cəl akääc ke ye tök ku bi ya γön Bëny. <sup>22</sup> Ku rin

ye wek tök kek ye, week aya wek kɔc kɔk, wek aacit  
kë buth bi Nhialic a rëer thïn ë Wëike.

### 3

#### *Luoi Paulo rin kɔc cie kɔc Itharel*

<sup>1</sup> Rin ci Nhialic ye looi bi kɔc Itharel ku kɔc cie  
kɔc Itharel mat bik aa tök, rin dhëënde tënë kɔc cie  
kɔc Itharel ke yen Paulo, raan ci mac rin wët Jethu  
Kritho ë rienkun, yen ë röök tënë Nhialic.

<sup>2</sup> Acäk pinj lɔn ci Nhialic ya lɔc ë dhëënde ba luoi  
kënë looi. <sup>3</sup> Nhialic acä nyuöth këden ci guuir, cïn  
raan njic ye thëer, athör wäär ca göt ke ciek. <sup>4</sup> Ku  
na kuenkë kāk ca göt, ke wek aabi kāk njic ke rin  
Raan ci lɔc ku dɔc deet yiic. <sup>5</sup> Kāk cïn raan njic ke  
thëer, cïmën ci Wëi Nhialic ye nyuöth atuuc ku kɔc  
kāk Nhialic tïn emën.

<sup>6</sup> Këya, kë ci moony akïn, rin wët puöth yam, kɔc  
cie kɔc Itharel aabi dɔc Nhialic yök kek kɔc Itharel  
ci gam. Keek aabi ya kac tök ku rɔmkë kë ci Nhialic  
thïn kɔc Itharel rin Raan ci lɔc ku dɔc.

<sup>7</sup> Kënë, yen ë Wët Puöth Yam ya lëk kɔc. Nhialic  
acä gäm luoi ye yen Wët Puöth Yam luëel riel ë  
dhëënde. <sup>8</sup> Yen atö ciëen kɔc ë Nhialic cök ëbën,  
ku Nhialic anot cä yiëk ë luoi këne, ba kɔc cie kɔc  
Itharel lëk kăpuöth juëc cïn thook akeu ye Raan ci  
lɔc ku dɔc gam. Kăpuöthkă aa dit tënë kāk ye deet  
yiic. <sup>9</sup> Acä yiëk luoi ba tët kɔc ëbën tē bi yen këden ci  
guuir cii njic, thääp thïn. Ku Nhialic yen cak këriëc  
ëbën, ëci këne moony tënë kɔc thëer wäär.

<sup>10</sup> Acï looi këlä emën dhël akut kɔc ci gam nyuöth  
atuuc nhial, kek banyken la riel nhial, bik njieëc  
kãnde ci nyuöth rin kë ci looi tënë ke njic. <sup>11</sup> Acï

Nhialic tak ku looi këya thæer këc yen piny ku nhial cak. Ku ë looi ë rin Jethu Kritho Bännya. <sup>12</sup> Rin cï yok ye gam ku yok aa tök ke ye, aabi yok la tənë Nhialic yo cïi riöc. <sup>13</sup> Këya, wek aa lëk bāk puöth cïi bath cök amën guum yen ë riengkun, guömdië yen abi ya riöldun.

*Nhiër Raan cï löc ku döc*

<sup>14</sup> Rin ë wët kënë, yen ë yanhiäl guöt piny Nhialic Wäda nom ku röök ë riengkun. <sup>15</sup> Köcken tö nhial ku köc tö piiny aa mac thok rin yen ë Wäda yodhie. <sup>16</sup> Yen ala riäl ku döc juëc ye gäm kacke. Këya, aya thiëc bi we yiëk riäl ë Wëike bāk puöth cïi köc. <sup>17</sup> Ku yen ë röök bi Raan cï löc ku döc rëer wepuöth athæer rin cï wek ye gam. Yen ë röök aya bi tē nhiær wek Nhialic thïn, ku tē nhiær wek röt thïn ë kamkun we cäl aril. Na luöikë këlä ke wek aa cït tim cï meike yet piny, ku yön buth cï niëc jöök cök. <sup>18</sup> Ku dhël kënë, week ku köc ë Nhialic abäk jäl niëc yen tē nhiær Raan cï löc ku döc we thïn. Anhiar yo apëi nhiër cïn thok akeu. <sup>19</sup> Na cök ciën raan niëc ye ayic yen tē nhiær Raan cï löc ku döc yo thïn, yen ë Nhialic thiëc bāk niëc. Ku bi tē ye wek luui thïn ciët tē ye Nhialic luui thïn.

<sup>20</sup> Nhialic ala riäl yen këñ looi wär käk yeku ke thiëc ku käk yeku ke tak, ku aaye ke looi riölden lui yopuöth. <sup>21</sup> Lecku Nhialic rin käpuöth cï looi rin akut köc cï gam ku rin Jethu Kritho. Lecku akölrüëc ëbën! Yenakan.

## 4

*Mën yic köc cï gam tənë guöp Jethu*

<sup>1</sup> Rin kë wïc Nhialic bi looi, yen raan cï mac rin looi yen wët Bëny, wek aläj bāk niëc luui dhël path,

dhël yen cī Nhialic we cɔl. <sup>2</sup> Yakë kāk yakë ke looi ëbën looi dhël athëëk ku lier ë puşu, ku yakë kɔc ɲɛc ciëëɲ. Nhiarkë röt ku yakë käreɔc päl piny ë kamkun. <sup>3</sup> Wëi Nhialic aci we mat yiic, themkë bāk la döör ë kamkun bāk aa kac tøk. <sup>4</sup> Ƴook ëbën, Ƴok aa thöŋ kek kāk tō guöp tøk yic, ku Ƴok aa la Wëi Nhialic thöŋ ciëŋ ke Ƴo. Ƴok aa ɲöth döc cī Nhialic thɔn ke bī gām kacke, rin Nhialic aci Ƴo cɔl ëbën buk aa kacke. <sup>5</sup> Ƴok aa la Bāny tøk ku gam tøk, ku Ƴok aaci lək ë wëi tøk yök ëbën. <sup>6</sup> Ƴook ëbën Ƴok aa Nhialic tööŋ door, ku yen ë Wāda Ƴodhie. Yen amɛc Ƴo ku ë luui Ƴopuöth ëbën, ku aciëŋ kek Ƴo ëbën.

<sup>7</sup> Raan cī lɔc ku döc aci raan ëbën ë kamkua yiëk rielden bī yen aluui. Nɛk aci yiëk rielde cit tē cī Raan cī lɔc ku döc ke tek thīn. <sup>8</sup> Aci göt athör thɛɛr wël Nhialic yic ëlä,  
 “Aci la nhial, ku looi jakrɛc bīk yeen buöth cök,  
 cimën raan cī döm ë tɔŋ yic,  
 ku tek kăpath tēnë kuat raan ëbën.”

<sup>9</sup> Tē lueel ye ëlä, “Aci la nhial.” Wëtde yic yenö? Wëtde yic aye lueel lɔn cī Raan cī lɔc ku döc kaŋ bën pinynhom ë tēn. <sup>10</sup> Raan cī bën pinynhom ë tēn yen ee raan tööŋ cī bën dhuk nhial, pan Nhialic, ku bī rëer kek kəriëëc ëbën pinynhom. <sup>11</sup> Ee yen Raan cī lɔc ku döc yen ë gɛm miöc tēnë kɔc. Aci kɔc kök looi bīk aa tuööcke, ku kɔc kök aaci looi bīk aa kɔc kāk Nhialic tīŋ, ku ye kɔc kök wël ë Nhialic lək kɔc, ku ye kɔc kök abiök kɔc cī gam ku piööckë ke. <sup>12</sup> Aci kënë looi rin bī köckä, kɔc ë Nhialic, guuir bīk luui tēnë ye ku bīk aakuut kɔc cī gam, yen guöp Raan cī lɔc ku döc la tueŋ ke ril. <sup>13</sup> Ku këlä, Ƴok aabi mat



yiiic buk aa tök ë gam bï yok Nhialic ku Wënde ñic. Ku jalku aa kəc cï gam cï nhïim bak, ku yok aabi jäl la cök cïmën Raan cï ləc ku dəc. <sup>14</sup> Ku yok aacie kəc bï ben ciët mïth. Ku yok aacïi kəc käk lueth piöc bï ben duöñ buk luethken gam, yok aacïi bï ya wel nhïim cïmën riäi, wël lueth ë path. <sup>15</sup> Yok aa dhil yic aa lueel ke yo la nhiër. Ku kälä yok aabi la tuen ke yo cït Raan cï ləc ku dəc yen wat akut kəc cï gam nhom. <sup>16</sup> Raan cï ləc ku dəc, ee kacke mat yiiic cïmën ye rël yom thook guöp ë raan nuët yic bï ya tök. Na loi guöp abak luəide cït tē dhil yen luui thïn, ke guöp ëbën ala tuen ke cil ke ril. Yen ë tēn akut kəc cï gam. Na nhiar kəc akut röt ku loikē luəiden, ka akut ala tuen apath ë riël Raan cï ləc ku dəc.

### *Yok aa dhil piërda waar yic*

<sup>17</sup> Rin ë wēt kēnē, alək we rin Bēny duökkē ben aa luui cïmën kəc kuc Nhialic. Käk yekē ke looi aacie käk ke kony. <sup>18</sup> Aacie yic ye deet. Acïn pir yam ye Nhialic gäm kəc, rin keek aa ril nhïim, ku këya aa kuc dhël ë Nhialic. <sup>19</sup> Aacie gup ë yär tē cök kek käreç looi, rin aa kepuəth yiək käk wïc guäpken. Käk yekē ke looi ëbën aa käk ë bal ku aacie köc luoi ë käkä yiiic.

<sup>20</sup> Yen ë tē wiēc bï wek cïi la thïn, rin acie yen tēwäär cï we piöc thïn rin Raan cï ləc ku dəc. <sup>21</sup> Ee yic, wek aaci wētde piñ, ku wek aa we cï piöc rienke, tē cït tēn yiny rēër kek Jethu. <sup>22</sup> Wek aaci piöc bak tēdun ye wek luui thïn thēer puəl. Käkku ke yakē ke looi aake cï we muör ku räckē we. <sup>23</sup> Emën, calkē röt aa wēer Nhialic puəth ku bäk ya tak tēñ ë yam. <sup>24</sup> Nhialic aci we gäm ciēñ ë yam

cit këde. Këya, yakë cien̄ ë ciεεη kënë. Ciεεη kënë ala cök cit tē ye yic rin Nhialic piöc th̄in.

<sup>25</sup> Këya, duökkë lueth ben aa lueel. N̄ek adh̄il yic alëk m̄athden c̄i gam, rin γok aa cit k̄äk c̄ii th̄oη r̄ëēr ë guäp t̄ök yic. <sup>26</sup> Na cök alon c̄i ȳin puöu riääk, ke ȳi duk adumuööm loi. Duk r̄ëēr kek riääk ë puöu abä aköl lööny piny. <sup>27</sup> Rin b̄i j̄oηrac ȳi c̄ii thel adumuööm yic. <sup>28</sup> Na le raan ye cuär theer kamkun ka c̄ii ben cuëer, adh̄il luui ë k̄oηde b̄i rot muk ku kony k̄oc η̄oη aya. <sup>29</sup> Pälkë kuöc jam. Yakë ke lueel wël k̄oc c̄al aril puöth gamden yic. Yakë ke lueel wël nh̄iar ke b̄i ke piη, rin b̄i ȳin k̄oc la kë l̄ëk ke, kony. <sup>30</sup> Muk ȳinhom b̄i ciën kë lueel b̄i Wëi Nhialic c̄al arem puöu, Wëi c̄i Nhialic ḡam ȳi. Nhialic ac̄i ḡam Wëi ye nyooth l̄on ë ȳin këde, ku Wëi Nhialic ab̄i r̄ëer kek ȳi yet aköl luηdit b̄i Nhialic ȳi kony t̄ënë j̄oηrac. <sup>31</sup> Duökkë k̄oc k̄ök ye maan ku duökkë puöth ye riääk. Duökkë ye göth ku läätkë k̄oc, t̄edë ke we loi k̄äk c̄ii path. <sup>32</sup> R̄ëērke apath ë kamkun. Ku yakë k̄arec päl piny t̄ënë k̄oc k̄ök c̄imën ye Nhialic ke päl piny t̄ënë we rin Raan c̄i l̄oc ku d̄oc.

## 5

### *P̄ir r̄ëer ruelyic*

<sup>1</sup> Këya, wek aa dh̄il luui c̄imën Nhialic rin ye wek m̄ithken nhiεer ap̄ei. <sup>2</sup> N̄hiarkë k̄oc k̄ök c̄imën nhiεer Raan c̄i l̄oc ku d̄oc γo. C̄imën c̄i Jethu ye nyuöoth l̄on nhiεer yen γo, rin c̄i yen thou b̄i γo luök. Kë c̄i looi, ac̄i Nhialic c̄al amit puöu rin c̄i yen rot juēr Nhialic. <sup>3</sup> W̄et ye wek k̄oc ë Nhialic ac̄ii path b̄i w̄ic

wïc ë diäär, ku käk kəc cəl ayär gup, ayi kook aa piɛŋ wegup.

<sup>4</sup> Jam la bi̯th ku buro rac aaci̯ path. Anuëen bäk Nhialic aleec rin käk ye ke looi tənë we.

<sup>5</sup> Dhielkë ɲic lɔn acin raan wïc ë diäär ayi raan ë luui käk kəc cəl ayär gup, ku raan dët kok lëu ye bi̯ la bääny Raan ci̯ lɔc ku dɔc kek Nhialic ë yic, ku yök kãpuo̯th ci̯ Nhialic thɔn kəc. Raan kok acit raan ë jak ci̯ kiëët door. <sup>6</sup> Duökkë röt cəl ameth ë nyin wël ci̯ path ye kəc kök lueel. Nhialic abi̯ kəc ci̯ wëtde ye piŋ, kəc luui ë käreckä tēm awuöc. <sup>7</sup> Këya duk ye mat kek kəc luui ë käreckä.

<sup>8</sup> Rin wek aa we rëer ë muö̯th yic. Ku emën wek aaci̯ röt mat kek Bëny, wek aaci̯ la ë ruel yic. Këya, yekë luui cimën kəc tō ë ruel yic. <sup>9</sup> Ÿen aluel kënë rin kəc tō ruel yic, kəc ɲic Nhialic, aaye ruel cəl alir puö̯th ku loikë kën ë yic. <sup>10</sup> Themkë bäk käk Bëny cəl amit puö̯ ɲic ku luoikë ke. <sup>11</sup> Duökkë ye luui käk ye kəc tō muö̯th yic looi, kəc kuc Nhialic. Nyuö̯thkë ke lɔn käkä aaci̯ path. <sup>12</sup> Käk ye ke looi ke cie tiŋ, aa rɛc apɛi ka ye jamden kəc rac gup <sup>13</sup> Të bi̯i kãŋ tÿyer, ke kəc aa tiŋ tÿ rɛɛc käkä thɔn, <sup>14</sup> rin ë ruel yen ë keriëc ëbën cəl atɔŋ. Yen aci̯ ye lueel ëlä, “Pääckë nin yic, jatkë röt rëŋ yiic ku Raan ci̯ lɔc ku dɔc abi̯ ruel wegup.”

<sup>15</sup> Tiëŋkë piërdun apath. Duökkë p̄ir ë p̄ir kəc kuc Nhialic, calkë röt aaye kəc ɲic kãŋ. <sup>16</sup> Kuat tÿ bi̯ yin ye yök ba këpath looi thɔn, ke loi, rin kəc aa loi käk ci̯ path emën. <sup>17</sup> Duökkë lui ë luoi kəc cinkë ɲickë, ɲieckë kë wïc Bëny ku yen luoikë. <sup>18</sup> Duökkë ye dek ë m̄ou, m̄ou ë kəc rac. Calkë Wëi Nhialic piërdun

yic akölaköl. <sup>19</sup> Kεtkε waak ε Nhialic cī gōt athōr waak yic ε kamkun. Kεtkε wak wēi bāk Bēny leec ε piāthkun ēbēn. <sup>20</sup> Yeku Nhialic Wāda leec akölaköl rin Bānyda Jethu Krītho, kuat kājuēc yeku ke looi yiic.

<sup>21</sup> Yakē rōt theek ε kamkun rin riöc wek Raan cī lōc ku dōc.

### *Diäär ku Röör*

<sup>22</sup> Wek diäär, thekkε rōörkun cīt tē ye wek Bēny theεk thīn. <sup>23</sup> Rin moc yen ε tik wat nhom, cīmēn ye Raan cī lōc ku dōc akut kōc cī gam wat nhom. Raan cī lōc ku dōc yen aluāŋ akut kōc cī gam, yen guāpde aya. <sup>24</sup> Kēya, diäär aa dhil rōörken theek cīmēn ye akut kōc cī gam Raan cī lōc ku dōc theek.

<sup>25</sup> Wek rōör wek aa dhil diäärkun nhiaar cīmēn nhiεεr Raan cī lōc ku dōc akut kōc cī gam arēk abī thou riεnke. <sup>26</sup> Acī thou rin akut kōc cī gam bī rēer ke dhēēŋ Nhialic. Ku lōk kegup pīu ε Nhialic pīu ε lōk wēi ku wētde. <sup>27</sup> Acī kēnē looi rin bī yen kacke kōc cī gam, wuöōny gup wei kāreεc ku bīi ke yelööm. Ku akēc wīc bīk gup la adumuööm. <sup>28</sup> Cīt ε kēnē aya, rōör aa dhil diäärken nhiaar cīmēn nhiεεr kek rōt. Na nhiaar moc tiεŋde, ka thōŋ kek lōn nhiεεr yen rot. <sup>29</sup> Acīn raan man guāpde, raan ε mīth ku tiit guāpde, cīmēn ye Raan cī lōc ku dōc akut kōc cī gam tiit, <sup>30</sup> rin ŋok akut kōc cī gam, ŋok aa guāpde. <sup>31</sup> Cīmēn cī ye gōt athōr theεεr wēl Nhialic yic ēlä, “Moc abī wun ku man nyāāŋ piny ku mεt rot kek tiεŋde, ku keek karou aabī ya tōk.” <sup>32</sup> Wēlkā aa la yiic yinydīt apεi, ku aa jam tē ye Raan cī lōc ku dōc tōk thīn kek akut kōc cī gam. <sup>33</sup> Ku wēlkā aa jam riεnkun aya,

moc adhil tienjde nhiaar cimën nhiεer yen rot, ku tik aya adhil muonyde theek.

## 6

### *Mith ku kɔc ke dhiëth ke*

<sup>1</sup> Wek mith, wek aadhil kɔc ke dhiëth we theek, rin yen ë këpath lëu bï raan looi rin Bëny. <sup>2</sup> “Thek wuur ku moor,” Kënë yen ë lõŋ tuenj cï bën kek athön, <sup>3</sup> athön akïn, “Na loi kënë, ke yïn abï käjuëc path ya yök, ku thiei yï ba nïn juëc nõk pinynhom.” <sup>4</sup> Kɔc ke dhiëth duökkë miëthkun ye luöi kāk bï ke rac puöth. Muökkë ke ku piöockë ke dhël cï Bëny gam.

### *Aloony ku Bány*

<sup>5</sup> Aloony, thekkë bánykun muk we pinynhom ë tën, riääckë ë ke ku thekkë ke piändun ëbën ciët we luui Raan cï lɔc ku dɔc. <sup>6</sup> Yakë luui ë puön yer tē cɔk kek cïi daai we. Loi luöidu puöu ëbën cït tē wïc Nhialic ye thïn, rin yïn alony Raan cï lɔc ku dɔc. <sup>7</sup> Na cɔk alɔn ye yïn alony, lui puön yer bï ciët Nhialic yen luöi. <sup>8</sup> Njic yïnhom lɔn bï Nhialic raan ëbën yiëk këde, alony ku raan cie alony, rin kăpuöth ye looi pinynhom. <sup>9</sup> Wek kɔc mac aloony, wek aadhil luui ë dhël tööŋ yic, ku duökkë ke ye riääc ë nääk, muökkë wenhïim lɔn week ëbën, aloony ku week, bënydun ë tök nhial, raan bï luk looi kamkun ëbën ke cïn raan ŋuëën.

### *Təŋ tənë Jəŋrac*

---

**6:1** Kol 3:20    **6:3** B.bei 20:12; L.rou 5:16    **6:4** Kol 3:21    **6:8**  
 Kol 3:22-25    **6:9** L.rou 10:17; Kol 3:25; 4:1

10 Wēt jäl lək we ciëen akīn, lömkē riel tēnē Bēny bāk riel ē ye, rin rielde adit apēi. 11 Lömkē kāk cī Nhialic gām we bī wek röt kony, bāk kajuēc ye jəŋrac we ruēēny göök. 12 Rin ɣok aaciī thār kek kəc cīt ɣo, ɣok aa thār kek jakrɛc rēēr ē muōth yic kek bānyken, ku riel ē jəŋrac tō nhial. 13 Kēya, rin ē wēt kēnē lömkē kāk cī Nhialic gām we bī wek təŋ thōr. Na akōl le jəŋrac bēn, ke we tit röt ye akōlriēc ēbēn. Ku na cāk təŋ jəŋrac göök kēriēc ēbēn yic, ke wek aabi dōŋ we ril. 14 Lömkē yic bī wek röt guiir ē təŋ. Ku luōikē kē la cök ke cīt alanh dhie ye raan yeyic duut tē le ye təŋ. 15 Rēēr kē ke we ye kəc lək Wēt Puōth Yam ē dōōr bēēi tēnē kəc. Ku yen abi ciēt lən cienj wek war ril apēi wecök. 16 Dēt akīn, gamkē Jethu Krītho. Gamdun abi ciēt kōn ye wek wieth dēp ye jəŋrac we moc jəc yiic. 17 Njiekē alanden lən cī Nhialic we luōk, acīt lən dhie cienj raan akuāma yenhom təŋ yic, bī cīi yup nhom. Lömkē wēt ē Nhialic ē bēn tēnē Wēi ke cīt təŋ ye muk. 18 Yakē lac rōök cīt tē ye Wēi Nhialic we cök puōth thīn. Ku thiēckē Nhialic bī we kony kēriēc ēbēn yiic. Yakē wepuōth cök tē rōök wek ku duōkkē thōr. Yakē rōök akōlakōl rin kəc ē Nhialic.

19 Rōōkkē ē riēnkiē, ku lən bī Nhialic ɣa gām wēl la cök ba lueel tē le ɣen wēt ē Nhialic lək kəc ke ɣa cīi riēc. 20 Jethu Krītho acā ləc ba ɣa atuōnyde ba kəc lək Wēt Puōth ē Yam, ku ē yen wēt cī ɣa mac. Kēya, rōōkkē ku thiēckē Nhialic bā gām riel ba wētde lək kəc ke cīt yiny dhiel looi ke cīn riōc.

### *Muōth ciëen*

<sup>21</sup> Tikuth, wämääthdan cī gam nhiarku, ku yeen alui apath rin Bëny, abī we lëk wël ë yam rienkië ku bāk kē luəi njic. <sup>22</sup> Yen atuəc we ku bī we la lëk kē loi rot tēnē yo, ku deet wepuəth aya.

<sup>23</sup> Bī Nhialic Wāda ku Bānyda Jethu Krītho we yiëk döör, wek kəc cī gam. Ku bīk we cəl anhiar röt ë kamkun ku muəkkë gamdun. <sup>24</sup> Bī Nhialic dhëənde nyuəth kəc nhar Bānyda Jethu Krītho kek nhiərden cīn thok akeu.

**Lëk yam**  
**New Testament in Dinka, Southwestern (SU:dik:Dinka,**  
**Southwestern)**

copyright © 2006 Wycliffe Bible Translators, Inc.

Language: Dinka, Southwestern

Translation by: Wycliffe Bible Translators, Inc.

Dinka, Southwestern

dik

Sudan

**Copyright Information**

© 2006, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Dinka, Southwestern

**© 2006, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.



Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

---

PDF generated using Haiola and XeLaTeX on 11 Nov 2022 from source files dated 29 Jan 2022

d94b9d26-33ff-5c4e-819f-5bfe86ac9e55